



KEMENTERIAN TENAGA DAN SUMBER ASLI

SIARAN MEDIA

PROGRAM PENANAMAN POKOK DAN PENGAYAAN DI TASIK CHINI, PAHANG

Kementerian Tenaga dan Sumber Asli (KeTSA) melalui Jabatan Perhutanan Semenanjung Malaysia (JPSM) dan Jabatan Perhutanan Negeri Pahang (JPNP) hari ini telah melaksanakan Program Penanaman Pokok dan Pengayaan di Tasik Chini, Pahang di bawah Program Penghijauan Malaysia : Kempen Penanaman 100 Juta Pokok.

Program Penanaman Pokok dan Pengayaan di Tasik Chini, Pahang turut dihadiri oleh YAB Menteri Besar Pahang, Ahli-ahli Majlis Mesyuarat Kerajaan Negeri Pahang, Pegawai-pegawai Kanan KeTSA dan jemputan daripada pejabat Setiausaha Kerajaan Negeri Pahang, Jabatan-jabatan Persekutuan dan Negeri, komuniti Orang Asli dan masyarakat setempat yang tinggal berdekatan dengan kawasan Tasik Chini serta pelajar-pelajar daripada Universiti Malaysia Pahang. Sebanyak 1,000 pokok daripada pelbagai spesies hutan telah ditanam. Saya turut berkesempatan meninjau keadaan dan usaha-usaha pemulihan yang sedang giat dilaksanakan di sekitar kawasan Tasik Chini.

Tasik Chini, Pahang yang berkeluasan 6,922.97 hektar merupakan Tapak Rizab Biosfera yang pertama di Malaysia yang diiktiraf *The United Nations Educational, Scientific and Cultural Organization* (UNESCO) di bawah Program *Man and the Biosphere* (MAB) pada 26 Mei 2009. Selain Tasik Chini, Malaysia turut mendapat pengiktirafan UNESCO bagi Banjaran Crocker, Sabah pada 12 Jun 2014 dan Bukit Bendera, Pulau Pinang pada 15 September 2021. Pada masa ini terdapat 738 Tapak Rizab Biosfera di 134 buah negara di seluruh dunia.

Program MAB merupakan suatu program saintifik antara kerajaan (inter-governmental) yang menetapkan asas saintifik bagi memperbaiki pertalian antara manusia dan alam sekitar dengan mengimbangkan keperluan pembangunan dan penjagaan alam sekitar.



KeTSAMalaysia



KeTSAMalaysia



ketsa.malaysia



ketsamalaysia1

#Selamatkan
Hutanmu Malaysia



#KELUARGA
MALAYSIA



KeTSA sentiasa menyokong komitmen dan usaha berterusan Kerajaan Negeri Pahang dalam memelihara dan memulihara kawasan Tapak Rizab Biosfera Tasik Chini. Pelbagai inisiatif sedang diambil oleh Kerajaan Negeri Pahang untuk menambah baik dan mengukuhkan pengurusan Tapak Rizab Biosfera Tasik Chini termasuk mengemas kini pengezonan bagi mengekalkan fungsi Tapak Rizab Biosfera Tasik Chini, mewartakan Hutan Simpanan Kekal Chini, melaksanakan aktiviti penguatkuasaan secara bersepadu, menghentikan aktiviti melombong dan mengukuhkan tadbir urus Tapak Rizab Biosfera Tasik Chini.

KeTSA juga telah menyediakan peruntukan sebanyak lebih RM1.5 juta sejak tahun 2016 bagi melaksanakan pelbagai kajian di Tasik Chini termasuk kajian kualiti air. Kerajaan Negeri Pahang juga telah membelanjakan RM4.018 juta menggunakan peruntukan *Ecological Fiscal Transfer for Biodiversity Conservation* (EFT) yang disediakan oleh Kerajaan Persekutuan bagi tempoh 2019 hingga 2021 untuk tujuan menambah baik pengurusan Tasik Chini.

Selain itu, KeTSA melalui JPSM telah mempergiatkan program penanaman pokok sejak tahun 2015 bagi memulihkan kawasan terosot yang turut melibatkan pihak berkepentingan seperti komuniti Orang Asli. Pada tahun 2022, JPSM dan JPNP sedang melaksanakan program pemulihan dan penghutan semula sekitar kawasan Tasik Chini termasuk dalam kawasan Hutan Simpanan Kekal Chini dengan peruntukan sebanyak RM800,000 di bawah inisiatif bajet Kumpulan Wang COVID-19 (KWC), Kementerian Kewangan Tahun 2022 iaitu Projek Pemerkasaan Komuniti dan Pemuliharaan Kawasan Rizab Biosfera Tasik Chini.

KeTSA sebagai *national focal point* bagi program MAB sentiasa menyokong segala usaha Kerajaan Negeri Pahang dalam memelihara dan mempertahankan status kawasan Tasik Chini sebagai Tapak Rizab Biosfera yang pertama di negara ini.

YB DATUK SERI TAKIYUDDIN BIN HASSAN
MENTERI TENAGA DAN SUMBER ASLI

10 SEPTEMBER 2022

Unit Komunikasi Korporat | Kementerian Tenaga dan Sumber Asli

Tel. : 03-8000 8000 | Faks : 03-8889 4763 | Web www.ketsa.gov.my

 KeTSAMalaysia  KeTSAMalaysia  [ketsa.malaysia](https://www.instagram.com/ketsa.malaysia)  [ketsamalaysia1](https://www.tiktok.com/ketsamalaysia1)

#Selamatkan
Harimau
Malaysia



#KELUARGA
MALAYSIA

